

# Wa mir en eidelt Blat hätten, ...

Iwwerleeungen zu de Formatiounsméiglechkeeten an de Gesondheets- a Fleegeberuffer

Vum Marie-France Liefgen \*

Des Ausso vum Minister Claude Meisch (DP) vis-à-vis vum Berufsverband vun den Infirmiëren an Infirmieren (ANIL) am Dezember 2020 schéngt mir wäit fort vum der Realitéit. An eiser Zäit gëtt et net mi vill wäiss Blieder.

Wat mir brauche fir eppes ze änneren si Wäitsicht, Fachwëssen an Zivilcourage, dëst si Kompetenzen, déi verschidde Politiker leider net mi hunn, och net an hirem Beroderkreess.

Och 1967, Joer vum der Gebuert vum haitegen Infirmier, gouf et kee wäiss Blat - mee säit Joerzengten e „garde-malade“ mat enger Ausbildung vum zwee Joer. 1967 huet eis Politik et fierdeg bruecht, eppes ganz Neies anzeféieren: De Beruff vum Infirmier, mat dräijäreg Ausbildung, deen d'Arbecht vum „garde-malade“ ersathuet, dëst ënnert enger CSV/LSAP-Regierung.


Des Ännerung war während enger Veierelsjoerhonnert vu grousser Erfolleg begleet. Vu 1970 bis 1995 war de lëtzebuerg Infirmiersdiplom en Diplom, dee mat der eischer europäescher Directive iwwert d'professsions réglementées 77/452/EEC zu 100 Prozent konform war. Déi Zäit war de Beruff nach eng „profession paramédicale“, wat leider joerzengtelang och esou gelieft gouf - den Dokter huet decideréit, d'Infirmière huet ausgefouert - obwuel d'Fleeg déi Zäit och schonn an der Gesetzgebung e ganz groussen eegestännege Verantwortungsbereich hat.

### Déi eischt Ännerungen

1992 sollt eng nei Reform vum Beruff gemaach ginn, mat engem Ofschloss als Bachelor, wéi dat a villen aneren europäesche Länner deemools schonn de Fall war. Leider ass des Weiderentwécklung vum Infirmiersberuff ënnert enger CSV/LSAP-Regierung net zustanekomm.

Wat huet deemools geännert: D'Formatioun vum Infirmier ass vum Ministère de la Santé bei de Ministère de l'Education nationale gewieselt, d'Schüler kruten zousätzlech zum Infirmiersdiplom hiren Diplôme de fin d'études secondaires techniques. D'Endresultat vum der Reform war eng duebel Katastroph: D'Formatioun war net méi konform mat der Directive européenne, déi seit 1977 a Kraaft war, well méi wéi 1 000 Stonne Formatioun gefeelt hunn, a vun den enseigneierte Stonne ware se laang net mi all „purement professionnel“, an eng Partie Schüler kruten hiren Infirmiersdiplom net, well se am „Bac technique“ an engem Sproochfach duerghefallsinn - obwuel se ganz gutt am professionellen Deel vun hirem Formatioun ofgeschidden haten.

Während iwwer zeng Joer huet Lëtzebuerg Infirmieren ausgebild, déi net konform zur neier europäescher Directive vum 2005 waren. 2007 hunn ech mat der



ANIL eng Plainte bei der Europäescher Kommissioun gemaach, an doropshin huet Lëtzebuerg d'Infirmièresformatioun missen anpassen. Ënnert enger CSV/LSAP-Regierung sinn aus dräi Joer véier Joer ginn (12e bis 15e) mat engem Bac technique op der 13e an engem Ofschloss BTS Infirmier (Brevet de technicien supérieur). Och des nei Versioun vum der Formatioun war net zefriddestellend: Praktesch zwee Drëttel vum de Schüler hunn no der Eeopgehalen fir eppes anescht ze studéieren - si hate jo elo e Bac technique. Déi Schüler, déi hir Infirmièresformatioun fierdeg gemaach hunn, hate keng Méiglechkeet, sech an hirem Beruff am Ausland akademesch weiderzebild, well si hate jo kee Bachelor, wéi et entretens an den meeschten aneren europäesche Länner de Fall war.

### E Wendepunkt

Elo, 2021 sti mer erëm op engem Wendepunkt, dëst ënnert enger DP/LSAP/Déi Gréng-Regierung. Fir elo déi richteg Entscheidung ze huelen brauch et Know-how aus dem Gesondheitswiesene a wéi ëmmer bei esou wäit greifende Entscheidungen och Zivilcourage als Regierung.

All Parteien, Gewerkschaften an Berufsverbänn sinn sechens - d'ANIL huet sech säit September 2020 mat himen ausgetosch - a si sinn alleguer d'accord, dass den Infirmiersberuff muss akademiséiert ginn, wéi et säit laangem scho bei 95 Prozent vun allen anere Gesondheitsberuffer de Fall ass.

Mir brauchen hei zu Lëtzebuerg eng eenzeg Zort „Infirmier en soins généraux“, konform zur europäescher Directive vum 2013 an zwar op Bachelor-Niveau, mat neien, reglementéierten Attribu-

tiounen, déi och deementsprechend bezuelt ginn.

Mir mussen alle Leit, déi am Fleegeemilieu wëllen schaffen, eng Méiglechkeet vu Passerellen vun engem Beruff an den aneren ubidden: vum Aide-socio-familial op den Aide-soignant, vum Aide-soignant op den Infirmier, a wann den Infirmier e Bachelor huet, stinn dono all Méiglechkeeten op fir weider e Master a verschidde Sparten an dono, fir deen, dee wëllt, och nach en Doktorat ze maachen.

Wat mir absolut net brauchen: Verschiddenen Sorten vu Infirmierspersonal, esou wéi den Educationministère sech dat virstellt, en Infirmier BTS, en Infirmier Bachelor, en Infirmier Bachelor „Plus“, en Infirmier Master, a wéll et esou präisgëschteg ass, och nach en Infirmier spécialisé, deen no sengem eischeite BTS (Bac+2) oder Bachelor (Bac+3) dann och nach zwee Joer mécht fir seng Spécialisatioun als Infirmier spécialisé ze kréien, an dest nees op Bachelor-Niveau (Bac+3).

### Verschidden Etappen

D'Iwwerleeung vum Minister Meisch an sengem Team sinn der Realitéit vun de Besoinen vum de schaffende Leit, hirem Potential a vun eiser heiteger Gesellschaft net ugepass.

Als liberale Politiker muss hien sech bewusst sinn, dass all Mënsch e Recht op Weiderentwécklung huet, an dass d'Formatiounen an engem Beräich deementsprechend mussen opgebaut sinn. Laut Pressecommuniqué ass et dem Här Meisch an der Madame Cahen bewusst, dass „den Infirmiersberuff an engem permanenter Evolution ass an dass dese Beruff (wéi déi aner Fleegeberuffer och) net an engem bestëmmte Wëssen oder a spezifeschen Akten figéiert ass.

Déi lescht Méint hätte gewisen, dass eis Gesondheet an déi vun eisen Nächsten eng absolut Prioritéit ass. Dofir misste mir an d'Qualitéit investéieren“.

Fir d'ANIL bedeit des Qualitéit folgendes: eng Duerchgängegkeet vum Aide-socio-familial bis hin zum Infirmier.

• En Aide-socio-familial schléisst seng Formatioun mat enger 9e of an hie kann dono eng Ausbildung en cours d'emploi als Aide-soignant machen

• En Aide-soignant misst mat enger 13e ofschléissen, fir dass hien, wann hien dat wëllt, dono sei Bachelor Infirmier en soins généraux ka maachen; et wier zimlech einfach, den Aide-soignant, op deen Niveau ze hiewen a mat aktualiséierten Attributiounen auszustatten, fir dass d'Formatioun der Verantwortung vum dem Beruff gerecht get

• Fir den Infirmier darf et nach just een Ausbildungswee ginn: No enger 13e soll hien de Bachelor Infirmier en soins généraux maachen, an zousätzlech Attributiounen kréien: all déi, di hiren Diplom vum der neier Gesetzgebung gemaach hunn, kréien d'Méiglechkeet, deesen Diplom nozemaachen, oder si maachen hire Beruff esou weider ewéi bis elo, bis den alen Diplom „ausgelaf“ ass, och dat ass et scho mat verschiddenen Carrièren hei ze Lëtzebuerg ginn

• Nom Bachelor Infirmier gëtt et verschidde Weiderbildungen: als Infirmier en pédiatrie, en psychiatrie, en anesthésie, en réanimation, als Assistant en chirurgie, als Infirmier de pratique avancée a verschidde medezinesche Spécialitéiten, a sécher och nach an aner Domainen, an dest esou wéi den Traité vu Bologna dat virgesäit op engem Master-Niveau

• Wann eng Infirmière sech no hirem Master nach wëll weider-

bilden, soll si zu Lëtzebuerg oder am Ausland d'Méiglechkeet hunn, en Doktorat maachen ze kënnen.

An et ass genau dat wat d'ANIL revendiquéiert. Wéi et aus dem Schema ersichtlech ass, huet d'ANIL sech och Gedanken iwwert all déi aner an der Fleege implizéiert Beruffer gemaach - jidderes soll sech kenne weiderentwéckelen.

### Eng grouss Verantwortung

Vläicht kann eis Lëtzebuerg Uni de Studiegang Infirmier en soins généraux och op zwou Sproochen ubidden, esou krite mir iergendwann genuch Infirmierspersonal, wat zu Lëtzebuerg ausgebild gett.

Och wann d'Blat net eidel ass, kënnen mir als Gesellschaft villes verbessern. Wien ass besser placéiert wéi d'Leit aus dem Milieu fir dorop déi richteg Äntwerten ze ginn - an déi gi leider net ëmmer gefrot. An wann se gefrot ginn, huet hir Meinung bei den Decisiounen oft net dee Stelleväert, deen si misst hunn.

Wéi d'Ministesch Paulette Le-nert sot: „Den Infirmiersberuff brauch spezifesch technesch Kompetenzen am Kader vun de medezinesche Behandlungen, genau esou wéi eng Expertise an der Fleege“ - a genau dofir setzt d'ANIL sech an.

Als Association, als Bierger an als ganz Gesellschaft hu mir alleger eng grouss Verantwortung fir déi Mënschen, déi mir fleeegen an och fir all déi Mënschen déi an der Fleege schaffen, fir dass d'Qualitéit vun der Fleege gesécheret a verbessert ka ginn.

\* D'Marie-France Liefgen ass Vizepresidentin vun der ANIL (Association Nationale des Infirmiers du Luxembourg), Formatrice bei „Omega 90“ am Palliative Care (säit 2005) an do virdrun Professeure-Infirmière (1984 bis 2005) am LTPS (Lycée Technique pour Professions de Santé)